

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԵՐԵՎԱՆ ՔԱՂԱՔԻ ԱՎԱԳԱՆԻ

« ---- » փետրվարի 2013թ.

N-----Ա

ՈՐՈՇՈՒՄ

ԵՐԵՎԱՆ ՔԱՂԱՔԻ ՊԱՏՎԱՎՈՐ ԿՈՉՈՒՄՆԵՐԻ ԵՎ ՊԱՐԳԵՎՆԵՐԻ ՄԱՍԻՆ

Ղեկավարվելով «Երևան քաղաքում տեղական ինքնակառավարման մասին»
Հայաստանի Հանրապետության օրենքի 12-րդ հոդվածի 1-ին մասի 33-րդ և 35-րդ կետերով՝

Երևան քաղաքի ավագանին որոշում է .

1. Սահմանել «Երևան քաղաքի պատվավոր կոչումները և պարգևները» համաձայն
N 1 հավելվածի:

2. Հաստատել.

- 1) «Երևանի պատվավոր քաղաքացի» վկայականի ձևը՝ համաձայն N 2 հավելվածի,
- 2) Երևանի քաղաքապետի պատվոգրի ձևը՝ համաձայն N 3 հավելվածի,
- 3) Երևանի քաղաքապետի շնորհակալագրի ձևը՝ համաձայն N 4 հավելվածի:

ԵՐԵՎԱՆԻ ՔԱՂԱՔԱՊԵՏ

Տ. ՄԱՐԳԱՐՅԱՆ

ԵՐԵՎԱՆ ՔԱՂԱՔԻ ՊԱՏՎԱՎՈՐ ԿՈՉՈՒՄՆԵՐԸ ԵՎ ՊԱՐԳՆԵՐԸ

1. ԸՆԴՀԱՆՈՒՐ ԴՐՈՒՅԹՆԵՐ

1. Սույնով կարգավորվում են Երևան քաղաքի պատվավոր կոչումներ և պարգևներ շնորհելու հարաբերությունները:

2. Երևան քաղաքի պատվավոր կոչումները և պարգևները նպատակ ունեն բարձր գնահատականի և խրախուսանքի արժանացնել անձանց և կազմակերպություններին՝ Երևանի հանրության առջև ունեցած առանձնահատուկ ծառայությունների, Երևան քաղաքի սոցիալ-տնտեսական զարգացմանն ու բարօրությանն ուղղված նշանակալի ներդրումների, գիտության, առողջապահության, կրթության, արվեստի, գրականության, սպորտի և մի շարք այլ բնագավառներում ունեցած ակնառու հաջողությունների, ինչպես նաև հասարակական, քաղաքական, բարեգործական արդյունավետ գործունեության համար:

3. Երևան քաղաքի պատվավոր կոչումներ և պարգևներ շնորհվում են Հայաստանի Հանրապետության քաղաքացիներին, օտարերկրյա պետությունների քաղաքացիներին և քաղաքացիություն չունեցող անձանց /այսուհետ՝ քաղաքացիներ/, ինչպես նաև կազմակերպություններին, ստեղծագործական և աշխատանքային կոլեկտիվներին:

4. Երևան քաղաքի պատվավոր կոչումներ և պարգևներ շնորհելու հիմնական սկզբունքներն են՝

1) պատվավոր կոչումների և պարգևների ներկայացվողներին առաջադրվող պահանջների ու պայմանների հավասարությունը և անկողմնակալությունը.

2) գործընթացի հրապարակայնությունը և թափանցիկությունը.

3) պատվավոր կոչումներ և պարգևներ շնորհելու իրավասությունների հստակ սահմանազատումը Երևան քաղաքի տեղական ինքնակառավարման մարմինների՝ Երևանի ավագանու և քաղաքապետի միջև:

2. ԵՐԵՎԱՆ ՔԱՂԱՔԻ ՊԱՐԳՆԵՐԸ

5. Երևան քաղաքի պարգևներն են՝

1) Երևանի քաղաքապետի ոսկե մեդալ,

2) Երևան քաղաքի մրցանակներ,

3) Երևանի քաղաքապետի պատվոգիր,

4) Երևանի քաղաքապետի շնորհակալագիր:

6. «Երևան քաղաքին բացառիկ ծառայություններ մատուցելու և նրա բարօրությանն ուղղված գործունեության համար» Երևանի քաղաքապետի ոսկե մեդալով պարգևատրվում են՝

1) Երևան քաղաքում ծավալած պետական, գիտական, ստեղծագործական, մշակութային և այլ գործունեության համար.

2) ազգային փոքրամասնությունների հետ բարեկամության ու համագործակցության ամրապնդմանը և օտարերկրյա պետությունների հետ փոխշահավետ գործակցության զարգացմանը նպաստելու համար.

3) ի շահ Երևան քաղաքի և Երևանցիների իրականացրած բարեգործական գործունեության համար:

4) Երևան քաղաքի զարգացման գործում մեծ ներդրումների, Երևանցիների բարեկեցությանը միտված գործունեության համար:

7. «Երևան քաղաքին բացառիկ ծառայություններ մատուցելու և նրա բարօրությանն ուղղված գործունեության համար» Երևանի քաղաքապետի ոսկե մեդալը «Երևան» մակագրությամբ ուղղանկյուն ամրակից կախված շրջանաձև մեդալն է, որը երիզված է Հայաստանի 12 մայրաքաղաքները խորհրդանշող եռանկյունիներով:

8. Երկրորդ շրջագծի մեջ պատկերված է Երևանի քաղաքապետարանի շենքը, որի ներքնում պատկերված է իշխանություն խորհրդանշող գավազանը բռնած թևավոր առյուծը:

9. Մեդալը պատրաստված է ոսկեջրած արծաթից:

10. «Երևան քաղաքին բացառիկ ծառայություններ մատուցելու և նրա բարօրությանն ուղղված գործունեության համար» Երևանի քաղաքապետի ոսկե մեդալով պարգևատրելու որոշումը կայացնում է Երևանի քաղաքապետը:

11. Ոսկե մեդալը և վկայագիրը հանդիսավոր պայմաններում պարգևատրված անձին է հանձնում Երևանի քաղաքապետը:

12. «Երևան քաղաքին բացառիկ ծառայություններ մատուցելու և նրա բարօրությանն ուղղված գործունեության համար» Երևանի քաղաքապետի ոսկե մեդալով կրկնակի պարգևատրում չի կատարվում:

13. Երևան քաղաքի ամենամյա մրցանակներն ըստ բնագավառների հետևյալներն են.

1) «Երևան քաղաքի մրցանակ գրականության և արվեստի բնագավառում»,
2) «Երևան քաղաքի մրցանակ առողջապահության բնագավառում»,
3) «Երևան քաղաքի մրցանակ գիտության և կրթության բնագավառում»,
4) «Երևան քաղաքի մրցանակ ֆիզիկական կուլտուրայի, սպորտի և տուրիզմի բնագավառում»,

5) «Երևան քաղաքի մրցանակ լրագրության և տեղեկատվության բնագավառում»:

6) «Երևան քաղաքի մրցանակ քաղաքաշինության բնագավառում»

14. Ամենամյա մրցանակներ շնորհվում են մասնագիտական, ստեղծագործական, գիտական և մանկավարժական գործունեության համար:

15. Երևան քաղաքի մրցանակը գրականության և արվեստի բնագավառում շնորհվում է առավել տաղանդավոր, արդիականությամբ և առանձնահատկությամբ աչքի ընկնող այն ստեղծագործությունների համար, որոնք հասարակական ճանաչում են ստացել և նպաստում են Երևան քաղաքում գրականության և արվեստի զարգացմանը:

16. Գրական ստեղծագործությունները մրցանակի են ներկայացվում միայն դրանք հրապարակելուց հետո, իսկ արվեստի ստեղծագործությունները՝ համերգներով, ցուցահանդեսներով, ներկայացումներով, կինոցուցադրումներով, մամուլով և հեռուստատեսությամբ հանրությանը լայնորեն ծանոթացնելուց հետո:

17. Երևան քաղաքի մրցանակն առողջապահության բնագավառում շնորհվում է այն բժիշկներին, բժիշկ-գիտնականներին և առողջապահության բնագավառի այլ աշխատողների, որոնք նպաստել են Երևան քաղաքում գործնական առողջապահության և բժշկական գիտության զարգացմանը՝ ստանալով հանրային ճանաչում:

18. Մրցանակի հավակնող աշխատանքները քննարկվում են բուժաշխատողների կոլեկտիվներում, հասարակական կազմակերպություններում, զանգվածային լրատվամիջոցներում:

19. Առողջապահության բնագավառի աշխատանքները կարող են մրցանակի ներկայացվել դրանք հրապարակելուց, կլինիկական փորձարկումներից, քաղաքի գործնական առողջապահության համակարգում ներդնելուց հետո միայն:

20. Երևան քաղաքի մրցանակը գիտության և կրթության բնագավառում շնորհվում է գիտնականներին՝ գիտության զարգացման գործում ձեռք բերած մեծ նվաճումների համար, հանրակրթության և նախադպրոցական հաստատությունների առավել տաղանդավոր ուսուցիչներին, դաստիարակներին և հաստատությունների ղեկավարներին՝ երեխաներին և դեռահասներին ուսուցանելու և դաստիարակելու գործում ունեցած մեծ արդյունքների համար, այն անձանց և կազմակերպություններին, որոնք էական ներդրում ունեն Երևան քաղաքում գիտության և կրթության զարգացման ասպարեզում:

21. Մրցանակի հավակնող նյութերն ու աշխատանքները ներկայացվում են Երևանի քաղաքապետարան:

22. Թեկնածուներին վերաբերող նյութերը և աշխատանքները մրցանակի կարող են ներկայացվել դրանք հրապարակելուց, գործնականում ներդնելուց, աշխատանքային կոլեկտիվներում, հասարակական կազմակերպություններում, զանգվածային լրատվամիջոցներում քննարկելուց հետո միայն:

23. Երևան քաղաքի մրցանակը ֆիզիկական կուլտուրայի, սպորտի և տուրիզմի բնագավառում շնորհվում է քաղաքացիների առողջությունն ամրապնդելուն, ակտիվ հանգիստը կազմակերպելուն, ֆիզիկական կատարելության հասնելուն, երեխաներին և պատանիներին կանոնավոր կերպով մարզական ասպարեզում ընդգրկելուն միտված առավել նշանակալի միջոցառումների և աշխատանքների, քաղաքացիների ֆիզիկական դաստիարակության հեռանկարային մեթոդներ և համակարգեր մշակելու և ներդնելու, քաղաքի հյուրանոցա-զբոսաշրջային համակարգում ֆինանսական և ներդրումային արդյունավետ քաղաքականություն իրագործելու, զբոսաշրջության և ենթակառուցվածքների մակարդակի որակական բարելավման, Երևան քաղաքի զբոսաշրջային հնարավորությունները վերհանելու, քարոզելու և զբոսաշրջային սպասարկման ձևերը կատարելագործելու համար:

24. Մրցանակի հավակնող աշխատանքները քննարկվում են համապատասխան հաստատությունների աշխատանքային կոլեկտիվներում և առաջարկությունները Երևանի քաղաքապետարանի աշխատակազմի սպորտի և երիտասարդության հարցերի բաժին, մշակույթի և տուրիզմի վարչություն են ներկայացնում Երևանի վարչական շրջանների ղեկավարների աշխատակազմերի համապատասխան ստորաբաժանումները:

25. Մրցանակի հավակնող աշխատանքները մրցանակի կարող են ներկայացվել դրանք հրապարակելուց, հասարակական քննարկումից և ֆիզիկական կուլտուրայի, սպորտի և զբոսաշրջության բնագավառում փաստացի ներդնելուց հետո միայն:

26. Երևան քաղաքի մրցանակը լրագրության և տեղեկատվության բնագավառում շնորհվում է այդ բնագավառում ցուցաբերած ակտիվ գործունեության, բարձր պրոֆեսիոնալիզմի, Երևանի կյանքին վերաբերող դեպքերի և իրադարձությունների վերաբերյալ օպերատիվ, ստույգ և անկողմնակալ տեղեկատվության համար:

27. Թեկնածուներին վերաբերող նյութերը և աշխատանքները մրցանակի կարող են ներկայացվել դրանք հրապարակելուց, մամուլով և հեռուստատեսությամբ հանրությանը լայնորեն ծանոթացնելուց հետո միայն:

28. Երևան քաղաքի մրցանակը քաղաքաշինության բնագավառում շնորհվում է այդ բնագավառում ձեռք բերած ակնառու հաջողությունների, ճարտարապետական յուրօրինակ կառույցների նախագծման և շինարարության համար:

29. Քաղաքաշինության բնագավառի աշխատանքները կարող են մրցանակի ներկայացվել դրանք իրականացնելուց և հասարակական ճանաչում ստանալուց հետո միայն:

30. Տվյալ բնագավառում մրցանակի հավակնող աշխատանքները ներկայացվում են Երևանի քաղաքապետի որոշմամբ ստեղծված մրցանակային հանձնաժողովին:

31. Երևան քաղաքի մրցանակով պարգևատրելու որոշումը կայացնում է Երևանի քաղաքապետը:

32. Մրցանակի արժանացած անհատին /կազմակերպություններին, ստեղծագործական կամ աշխատանքային կոլեկտիվներին/ մրցանակի դափնեկրի վկայագիր, ինչպես նաև դրամական պարգև կամ հուշանվեր է հանձնում Երևանի քաղաքապետը հանդիսավոր պայմաններում:

33. Նոր խոշոր ձեռքբերումների համար մրցանակի դափնեկիրը կարող է նորից դրան արժանանալ:

34. Երևանի քաղաքապետի պատվոգրով անձինք /կազմակերպությունները, ստեղծագործական կամ աշխատանքային կոլեկտիվները/ պարգևատրվում են Երևան քաղաքի զարգացման գործում մեծ ներդրումների և Երևանի հանրությանը մատուցած ծառայությունների համար:

35. Երևանի քաղաքապետի պատվոգրի գեղարվեստական ձևավորման տարրերը սովորաբար Վրա գունավոր են, իսկ գրությունները՝ սև, կատարված ուղղահայաց (գրքային) տարբերակով:

36. Պատվոգրի վերևի մասի կենտրոնում գետեղված է Երևան քաղաքի զինանշանը, ավելի ներքև ձևավոր շրջանակում «Երևանի քաղաքապետի» գրությունն է՝ մեկ տողով, որի ներքևում՝ «ՊԱՏՎՈԳՐ» գրությունն է: Պատվոգրի կենտրոնում նշվում է պարգևատրվածի պաշտոնը, անունը, ազգանունը, հայրանունը /կազմակերպության, հիմնարկի անվանումը/ և հակիրճ հիմնավորվում է պարգևատրվելու հանգամանքը: Տեքստից ներքև մեկ տողի վրա գրություններ են՝ «Երևանի քաղաքապետ», քաղաքապետի անունը, ազգանունը, ինչպես նաև ստորագրությունն ու կնիքը:

37. Պատվոգրի շրջանակի ստորին ձախ մասում նշվում է պատվոգրի տրման ամսաթիվը, իսկ շրջանակի կենտրոնում՝ Երևանի քաղաքապետարանի շենքի ճակատային հատվածն է՝ ձվաձև կրկնակի շրջանակում ներառված:

38. Պատվոգիրը գետեղվում է հատուկ փափուկ թղթապանակում:

39. Երևանի քաղաքապետի պատվոգրով պարգևատրելու որոշումը կայացնում է Երևանի քաղաքապետը և այն պարգևատրված անձին է հանձնում հանդիսավոր պայմաններում:

40. Երևանի քաղաքապետի շնորհակալագրով պարգևատրվում են Երևան քաղաքի հանրության առջև վաստակ ունեցող քաղաքացիները /կազմակերպությունները, ստեղծագործական կամ աշխատանքային կոլեկտիվները/՝ տնտեսական, գիտահետազոտական, սոցիալ-տնտեսական, հասարակական և բարեգործական գործունեության համար:

41. Երևանի քաղաքապետի շնորհակալագրի գեղարվեստական ձևավորման տարրերը ստվարաթղթի վրա գունավոր են, իսկ գրությունները՝ սև, կատարված ուղղահայաց (գրքային) տարբերակով:

42. Շնորհակալագրի վերևի մասի կենտրոնում գետեղված է Երևան քաղաքի զինանշանը, ավելի ներքև ձևավոր շրջանակում «Երևանի քաղաքապետի» գրությունն է՝ մեկ տողով, ավելի ցածր՝ «ՇՆՈՐՀԱԿԱԼԱԳԻՐ» գրությունն է: Շնորհակալագրի կենտրոնում նշվում է պարգևատրվածի պաշտոնը, անունը, ազգանունը, հայրանունը /կազմակերպության, հիմնարկի անվանումը/ և հակիրճ հիմնավորվում է պարգևատրվելու հանգամանքը: Տեքստից ներքև մեկ տողի վրա գրություններ են՝ «Երևանի քաղաքապետ», քաղաքապետի անունը, ազգանունը, ստորագրությունն ու կնիքը:

43. Շնորհակալագրի շրջանակի ստորին ձախ մասում նշվում է շնորհակալագրի տրման ամսաթիվը, իսկ շրջանակի կենտրոնում՝ Երևանի քաղաքապետարանի շենքի ձևկատային հատվածն է՝ ձվաձև կրկնակի շրջանակում ներառված:

44. Շնորհակալագիրը գետեղվում է հատուկ փափուկ թղթապանակում:

45. Երևանի քաղաքապետի շնորհակալագրով պարգևատրելու որոշումը կայացնում է Երևանի քաղաքապետը և այն պարգևատրված անձին է հանձնում հանդիսավոր պայմաններում:

3. ԵՐԵՎԱՆԻ ՊԱՏՎԱՎՈՐ ԿՈՉՈՒՄՆԵՐԸ

46. Երևանի պատվավոր կոչումներն են՝

- 1) Երևանի պատվավոր քաղաքացի,
- 2) Երևանի պատվավոր կոչումներ՝ ըստ մասնագիտությունների:

47. «Երևանի պատվավոր քաղաքացի» կոչումը շնորհվում է Հայաստանի Հանրապետության և օտարերկրյա պետությունների քաղաքացիներին քաղաքի զարգացման գործում նշանակալի ավանդ ունենալու համար՝ քաղաքի բարօրությանը, բարգավաճմանը միտված անձնական գործունեությունը խրախուսելու նպատակով:

48. «Երևանի պատվավոր քաղաքացի» կոչումը շնորհելու հիմքերն են՝

- 1) բացառիկ մեծ վաստակը Երևան քաղաքի բարգավաճման գործում,
- 2) քաղաքացու հեղինակությունը Երևան քաղաքի բնակչության շրջանում, որը ձեռք է բերվել Հայաստանի Հանրապետության և Երևան քաղաքի համար նշանակալի գործունեությամբ,

49. Օտարերկրյա պետությունների քաղաքացիներին «Երևանի պատվավոր քաղաքացի» կոչումը շնորհվում է նաև այլ հիմքերով, այդ թվում՝ այս կոչումը շնորհելուց բխող հասարակական-քաղաքական հնչեղությամբ:

50. «Երևանի պատվավոր քաղաքացի» կոչմանն արժանացած անհատին շնորհվում է «Երևանի պատվավոր քաղաքացի» հուշամեդալ, «Երևանի քաղաքապետարան» ոսկե կրծքանշան, «Երևանի պատվավոր քաղաքացու» վկայական և շնորհագիր:

51. «Երևանի պատվավոր քաղաքացի» հուշամեդալի դիմային մասում պատկերված է Երևանի զինանշանը, որը ներքևից կիսաշրջագծում է «Երևանի պատվավոր քաղաքացի» մակագրությունը:

52. Հուշամեդալի հակառակ կողմում, որպես հնի ու նորի համադրում, պատկերված է ճարտարապետ Ալեքսանդր Թամանյանի կողմից նախագծած Երևան քաղաքի հատակագիծը, որի աջ կողմում Երևանի նախահայր Արգիշտի թագավորի հարթաքանդակն է՝ քաղաքի տարեթիվը փաստող սեպագիր արձանագրությամբ:

53. Հուշամեդալը պատրաստվում է արծաթից:

54. «Երևանի քաղաքապետարան» ոսկե կրծքանշանի վրա Երևանի քաղաքապետարանի շենքի մոդելն է, որի ներքևում՝ պատվանդանի վրա «Երևան» մակագրությունն է:

55. Կրծքանշանը պատրաստվում է ոսկեջրած արծաթից:

56. «Երևանի պատվավոր քաղաքացի» կոչում շնորհելու վերաբերյալ որոշումը ընդունում է Երևան քաղաքի ավագանին՝ Երևանի քաղաքապետի առաջարկությամբ, անհատապես, ցմահ, և այդ կոչումը ետ վերցնելու ենթակա չէ:

57. Երևանի քաղաքապետը ստորագրում է Պատվավոր քաղաքացու վկայականը:

58. «Երևանի պատվավոր քաղաքացի» հուշամեդալը, «Երևանի քաղաքապետարան» ոսկե կրծքանշանը և «Երևանի պատվավոր քաղաքացու» վկայականն ու շնորհագիրը այդ կոչմանն արժանացած քաղաքացուն հանձնում է Երևանի քաղաքապետը՝ հանդիսավոր պայմաններում:

59. Պատվավոր քաղաքացիների անունները ժամանակագրական կարգով գրանցվում են Երևան քաղաքի Պատվավոր քաղաքացիների մատյանում:

60. Երևան քաղաքի Պատվավոր քաղաքացիների մատյանը մշտապես պահպանվում է Երևանի քաղաքապետարանի աշխատակազմում:

61. Երևան քաղաքի պատվավոր կոչումներն ըստ մասնագիտությունների շնորհվում են մեծ վաստակի և մասնագիտական գործունեության համար:

62. Ըստ մասնագիտությունների Երևան քաղաքի պատվավոր կոչումների տեսակներն են՝

- 1) Երևան քաղաքի պատվավոր մանկավարժ.
- 2) Երևան քաղաքի պատվավոր բժիշկ.
- 3) Երևան քաղաքի մշակույթի պատվավոր գործիչ.
- 4) Երևան քաղաքի սպորտի պատվավոր գործիչ.
- 5) Երևան քաղաքի պատվավոր սոցիալական ծառայող,
- 6) Երևան քաղաքի պատվավոր փրկարար,
- 7) Երևան քաղաքի պատվավոր շինարար:

63. Ըստ մասնագիտությունների Երևան քաղաքի պատվավոր կոչումներ շնորհելու որոշումը կայացնում է Երևանի քաղաքապետը, որը Երևան քաղաքի պատվավոր կոչմանն արժանացած անձին հուշամեդալ և շնորհագիր է հանձնում հանդիսավոր պայմաններում:

4. ԵԶՐԱՓԱԿԻՉ ԴՐՈՒՅԹՆԵՐ

64. Պարգևատրված անձի մահվան դեպքում պարգևները և դրանց վկայագրերը կարող են որպես հիշատակ պահվել նրա ժառանգների մոտ կամ վերջիններիս համաձայնությամբ և Երևանի քաղաքապետի գիտությամբ հանձնվել թանգարաններին:

65. Եթե պարգևատրված անձը չունի ժառանգներ, նրա մահվանից հետո պարգևները և դրանց վկայագրերը վերադարձվում են Երևանի քաղաքապետարանի աշխատակազմ:

66. Երևան քաղաքի պարգևներով պարգևատրված քաղաքացիները, դրանց վկայագրերը կորցնելու դեպքում պահպանում են իրենց իրավունքները:

67. Պարգևների կրկնօրինակներ տրվում են պարգևատրված անձի դիմումի հիման վրա՝ Երևանի քաղաքապետի կողմից:

68. Կորցրած պարգևների և դրանց վկայագրերի կրկնօրինակները պարգևատրված անձանց հանձնում է Երևանի քաղաքապետարանի աշխատակազմի քարտուղարը:

Հավելված N 2

Երևան քաղաքի ավագանու
2013 թվականի փետրվարի 12-ի
N ----Ա որոշման

Ձեռք

«ԵՐԵՎԱՆԻ ՊԱՏՎԱՎՈՐ ՔԱՂԱՔԱՑԻ» ՎԿԱՅԱԿԱՆԻ ՆԿԱՐԱԳԻՐԸ

ԵՐԵՎԱՆԻ ՔԱՂԱՔԱՊԵՏԱՐԱՆ ՎԿԱՅԱԿԱՆ N	YEREVAN MUNICIPALITY CERTIFICATE N
Անուն, ազգանուն	Name, last name
ԵՐԵՎԱՆԻ ՊԱՏՎԱՎՈՐ ՔԱՂԱՔԱՑԻ	HONOURABLE CITIZEN OF YEREVAN
Շնորհված է Երևան քաղաքի ավագանու -----թ. հ. –Ա որոշմամբ	AWORDED BY THE DECISION OF THE COUNCIL OF THE ELDERS OF YEREVAN
ՔԱՂԱՔԱՊԵՏ ----- Անուն, ազգանուն	----- N-A
Ստորագրություն, կնիք	MAYOR ----- Name, last name

ՁԵՎ
ԵՐԵՎԱՆԻ ՔԱՂԱՔԱՊԵՏԻ ՊԱՏՎՈԳՐԻ ՆԿԱՐԱԳԻՐԸ



ԵՐԵՎԱՆԻ ՔԱՂԱՔԱՊԵՏԻ

Պ Ա Տ Վ Ո Գ Ի Ր

Պաշտոնը

Անուն, ազգանուն, հայրանուն

Պարզևատրելու հանգամանքը

ԵՐԵՎԱՆԻ ՔԱՂԱՔԱՊԵՏ

Ստորագրություն, կնիք

ԱՆՈՒՆ, ԱԶԳԱՆՈՒՆ

«----» -----
Ամիս ամսաթիվ տարեթիվ

Ձե՛վ
ԵՐԵՎԱՆԻ ՔԱՂԱՔԱՊԵՏԻ ՇՆՈՐՀԱԿԱԼԱԳՐԻ ՆԿԱՐԱԳԻՐԸ



ԵՐԵՎԱՆԻ ՔԱՂԱՔԱՊԵՏԻ

ՇՆՈՐՀԱԿԱԼԱԳՐԻ

Պաշտոնը

Անուն, ազգանուն, հայրանուն

Պարգևատրելու հանգամանքը

ԵՐԵՎԱՆԻ ՔԱՂԱՔԱՊԵՏ

Ստորագրություն, կնիք

ԱՆՈՒՆ, ԱԶԳԱՆՈՒՆ

«----» -----
Ամիս ամսաթիվ տարեթիվ

ՏԵՂԵԿԱՆՔ-ՀԻՄՆԱՎՈՐՈՒՄ

«ԵՐԵՎԱՆ ՔԱՂԱՔԻ ՊԱՏՎԱՎՈՐ ԿՈՉՈՒՄՆԵՐԻ ԵՎ ՊԱՐԳԵՎՆԵՐԻ ՄԱՍԻՆ» ԵՐԵՎԱՆ ՔԱՂԱՔԻ ԱՎԱԳԱՆՈՒ ՈՐՈՇՄԱՆ ՆԱԽԱԳԾԻ ԸՆԴՈՒՆՄԱՆ ԱՆՀՐԱԺԵՇՏՈՒԹՅԱՆ ՎԵՐԱԲԵՐՅԱԼ

Երևան քաղաքի պատվավոր կոչումները և պարգևները նպատակ ունեն բարձր գնահատականի և խրախուսանքի արժանացնել անձանց ու կազմակերպություններին՝ Երևանի հանրության առջև ունեցած առանձնահատուկ ծառայությունների, Երևան քաղաքի սոցիալ-տնտեսական զարգացմանն ու բարօրությանն ուղղված նշանակալի ներդրումների, գիտության, առողջապահության, կրթության, մշակույթի, գրականության, սպորտի և մի շարք այլ բնագավառներում ակնառու հաջողությունների, ինչպես նաև հասարակական, քաղաքական, բարեգործական արդյունավետ գործունեության համար:

Տարիներ շարունակ Հայաստանի Հանրապետության քաղաքացիներին, օտարերկրյա պետությունների քաղաքացիներին, քաղաքացիություն չունեցող անձանց, ինչպես նաև կազմակերպություններին Երևան քաղաքի պատվավոր կոչումներ շնորհելու և պարգևներով պարգևատրելու գործընթացը կարգավորվել է Երևանի խորհրդի 08.10.2007թ. հ.14 նիստում համաձայնեցված «Երևանի խորհրդի և Երևանի քաղաքապետի որոշումների հիման վրա մեդալների և հուշամեդալների տրման կարգով», սակայն այդ կարգում հստակ չեն նշվում Երևան քաղաքի պատվավոր կոչումների տեսակներն ըստ մասնագիտությունների, ինչպես նաև հուշամեդալների նկարագրերը:

Սույն նախագծով սահմանվում են Երևանի քաղաքապետի պատվոգրով և շնորհակալագրով պարգևատրելու սկզբունքները, ինչպես նաև Երևանի քաղաքապետի պատվոգրի, շնորհակալագրի և «Երևանի պատվավոր քաղաքացի» վկայականի նկարագրերը:

Հաշվի առնելով վերոգրյալը՝ առաջարկվում է Երևան քաղաքի ավագանու քննարկմանը ներկայացնել «Երևան քաղաքի պատվավոր կոչումների և պարգևների մասին» որոշման նախագիծը, որով կկարգավորվեն Երևան քաղաքի պատվավոր կոչումներ և պարգևներ շնորհելու հարաբերությունները:

ԵՐԵՎԱՆԻ ՔԱՂԱՔԱՊԵՏ

Տ. ՄԱՐԳԱՐՅԱՆ

ՏԵՂԵԿԱՆՔ

**«ԵՐԵՎԱՆ ՔԱՂԱՔԻ ՊԱՏՎԱՎՈՐ ԿՈՉՈՒՄՆԵՐԻ ԵՎ ՊԱՐԳԵՎՆԵՐԻ ՄԱՍԻՆ»
ԵՐԵՎԱՆ ՔԱՂԱՔԻ ԱՎԱԳԱՆՈՒ ՈՐՈՇՄԱՆ ՆԱԽԱԳԾԻ ԸՆԴՈՒՆՄԱՆ ԱՌՆՉՈՒԹՅԱՄԲ
ԱՅԼ ԻՐԱՎԱԿԱՆ ԱԿՏԵՐԻ ԸՆԴՈՒՆՄԱՆ ԱՆՀՐԱԺԵՇՏՈՒԹՅԱՆ ԿԱՍ
ԲԱՑԱԿԱՅՈՒԹՅԱՆ ՎԵՐԱԲԵՐՅԱԼ**

«Երևան քաղաքի պատվավոր կոչումների և պարգևների մասին» որոշման նախագծի ընդունման առնչությամբ այլ իրավական ակտերի ընդունման անհրաժեշտություն չի առաջանում:

ԵՐԵՎԱՆԻ ՔԱՂԱՔԱՊԵՏ

Տ. ՄԱՐԳԱՐՅԱՆ

ՏԵՂԵԿԱՆՔ

**«ԵՐԵՎԱՆ ՔԱՂԱՔԻ ՊԱՏՎԱՎՈՐ ԿՈՉՈՒՄՆԵՐԻ ԵՎ ՊԱՐԳԵՎՆԵՐԻ ՄԱՍԻՆ»
ԵՐԵՎԱՆ ՔԱՂԱՔԻ ԱՎԱԳԱՆՈՒ ՈՐՈՇՄԱՆ ՆԱԽԱԳԾԻ ԸՆԴՈՒՆՄԱՆ
ԿԱՊԱԿՑՈՒԹՅԱՄԲ ԵՐԵՎԱՆ ՔԱՂԱՔԻ ԲՅՈՒՋԵԻ ԵԿԱՄՈՒՏՆԵՐՈՒՄ ԵՎ
ԾԱԽՍԵՐՈՒՄ ՍՊԱՍՎԵԼԻՔ ՓՈՓՈԽՈՒԹՅՈՒՆՆԵՐԻ ՎԵՐԱԲԵՐՅԱԼ**

«Երևան քաղաքի պատվավոր կոչումների և պարգևների մասին» որոշման նախագծի ընդունման կապակցությամբ Երևան քաղաքի բյուջեի եկամուտներում և ծախսերում փոփոխություններ չեն առաջանում:

ԵՐԵՎԱՆԻ ՔԱՂԱՔԱՊԵՏ

Տ. ՄԱՐԳԱՐՅԱՆ